

山西通志卷第一百三十九

山西巡撫都察院右副都御史臣覺羅石麟奏

旨修輯

人物三十 文苑四

蒲州府

國朝

王巖正字惟肖號歷陽猗氏縣人巖正世家子早有文名文翔鳳孔貞運胥賞之前庚午舉於鄉闖賊逼授偽職佯疾以智免順治己丑土寇陷城將屠令家遣諜者說以利害已而令操兵至單騎前迎說以民無反狀令與猗民胥賴之雅嗜宋大儒書立觀生書院父光祿嘗著五經窮抄出入與偕亂後刊以訓承學士著四書翼抄周易翼抄四書

山西通志 卷一百二十九
人物彙考周易圖說性理增刪數十卷

王含光字表樸號似鶴猗氏人春楨子幼孤受教於祖珍吾前辛未進士初授行人詣闕陳母節蒙恩建坊自珍吾至含光進士三世行人亦三世云順治中以按部者薦授儀制司員外歷考功文選司郎中轉河南按察使居官清慎終始如一工詩七言近體擅名一時又工畫

王含真字樸齋號寅若猗氏縣人幼穎悟工文章髫年餽於庠中乙卯鄉試丙辰成進士戊午舉博學宏儒戊辰赴銓疾作卒含真學有根柢與人言率本諸經好義樂施知舊多賴以舉火嘗建尊經閣聚書及士月試之如舉場例置爲我乎館穀猗氏縣學公儒時以父嚴徵前不飲去父促之不得已就試試畢即日馳歸父卒雖骨

苦居見者胥嘆其孝歿之日邑人無識不識胥爲流涕

郭九會字繹茲猗氏縣人性警敏雅好讀書年十三入城輒袖書以從返輒緣途雜誦以爲常中康熙己酉鄉試第一墨義出都人士爭傳誦之久困公車學益淹博詩古文辭日益工著存草二十卷授臨安知縣以嚴勤爲治嘗謂嚴則人知有刑後將無刑勤則我知有事後將無事臨安俗健鬪號打降又多構墳山訟至是俗一變後解組歸手不釋卷指授後學不少倦易簣時以一盃自酌吟少陵自知白髮非春事至且盡芳樽四字氣遂不屬蓋翛然去來之際如此弟九同己卯庚辰聯雋進士官新野知縣亦號沉

靜

王恭先字孝伯號一峰臨晉縣人父廣文萬基高才不第前

丁卯試猗氏令曹暹夢萬基舉首則恭先始生之年也順治辛卯恭先果舉山西第一己亥成進士授河間府推官缺裁補崇明知縣崇學校滌煩苛減苗糧三百石有奇以鐫級歸恭先嘗偕邑人李世惠安邑周訓成讀書南山柏梯寺又涉江淮游吳會入關眺終南北走朔方南盡漢沔在崇明以校士入金陵購經史子集捆載以歸盡發筐衍藏弄日夜編摩詩文以韓蘇陸虞爲宗嘗讀遺山滄海橫流却是誰句慨然太息慕高達夫五十學詩輯詩文曰慕適軒集晚年曰老學庵集修臨晉縣志簡而瞻覆具史家體裁

吳雯字天章蒲州人性至孝事母暨祖祖母胥安其養嗜讀書鍵戶永樂鎮讀父學正允升藏弄不懈益勤久之於經

史秦漢暨唐宋元明諸作者源流同異悉能確指其故不
屑爲帖括家言戊午舉博學宏儒臨朐馮相國新城王司
寇讀其所作詩文大加賞歎晚年築室谷口家日貧詩日
工著蓮洋集若干卷行於世

謝陳常字文洽臨晉人甲子中鄉試乙丑成進士選翰林院
庶吉士授編修充丙子廣東鄉試主考請告歸里以病卒
一於家陳常善文章工書法鄉舉時座主爲趙太史執信趙
以古學名海內鮮所推許得陳常文亟加嘆賞舉進士與
仇兆鰲孫勳俞長城諸公稱同年生橫鶩獨立當世推爲
文雄典試粵中得陳鶚薦爲第一其他名士若吳山帶等
搜羅無遺居父母喪矯陋俗循古禮尤爲大雅樂道不置
云

楊于階字繩我榮河縣人潛心理學日玩太極西銘諸書窗
草盆魚俯仰有自得之趣閱四十年履城市年八十五歲
無病卒弟子張孝廉殿珠三十餘人爲樹碑於墓上

郭凝然字石潛號栢崖榮河人餽於庠博綜經籍著中庸衍
義河洛經世地理中庸諸書栢崖稿亦成一家言

遼州

金

趙岐遼州人明昌五年爲襄垣令威惠並施吏民懷畏工詩
爲時所重

沁州

元

王忠武鄉人少穎悟力學事母以孝聞平生崇正闢邪鄉黨

推爲端士云

任斗南武鄉人貢生少負文名邑中碑銘多出其手子原明
初舉人歷官吏部右侍郎

明

朱遜沁源人宣德間舉鄉試第一官乾州學正志趣高潔棄
官歸優游林下閉戶歌風者二十餘年號南石居士

國朝

程康莊字崑崙武鄉人工文陳大士羅文止楊子常胥稱之
前乙亥選貢

國朝任鎮江府通判攝大營理事官治訟不少偏民甚賴之
公餘與諸生賦詩論文無虛日遷安慶府同知左遷耀州
知州

趙三麒字乾符武鄉縣人順治戊子拔貢授桂陽州同知補
泰州擢同州知州補橫州致仕歸三麒幼穎異讀書過目
不忘長肄父廷汴兄天麒訓博綜典籍能窺古作者立言
指趣文名籍甚起幕佐洊涖民社所至以循卓著有彈琴
栽花遺風案牘暇輒潛心書史嘗讀兩漢循吏傳掩卷太
息者久之旣歸寢衰耄猶手一卷不釋謁文者屢滿戶外
嘗偕張文舉魏惠菴諸公會飲三樂堂年胥八十餘歲時
人羨之號爲漳濱八老著似園集楚游草牧同紀略醫脉
繫辭諸書藏於家

平定州

宋

侯可字無可道濟子少以氣節自喜旣壯篤志爲學博極羣

書聲聞四馳尤熟於西北形勢開渭源地八百頃猝與敵
遇分其騎爲三高幟徐行敵不敢動以討儂智高功拜武
爵不就改文資歷大理寺評事遷殿中丞皆有異績生平
以勸學新民爲已任晚寃心於天人性命之學喜規人過
寓居華陰自陝以西學者莫不宗之

侯仲良字師聖孟縣人可子仲良與二程爲中表弟兄遂心
性理初從伊川學未悟乃策杖訪濂溪濂溪留之對榻夜
談越三日自謂有得如見天之廣大往質伊川伊川訝其
不凡曰非從濂溪來邪後遊荆門胡文定公重之留與爲
隣嘗遺書楊大諫曰侯仲良者去春自荆門遺卒甲馬之
中脫身相就於漳水之濱今已兩年其安於羈苦守節不
移固所未有至於論講經術則通貫不窮商略時事則纖

微皆察方值艱難使此輩身老貧賤亦良可慨尋卒所著有論語說及雅言行世

張紹先博綜羣書登元祐二年進士擢將作少監轉翰林承旨以文學著名

金

楊恕雲翼子平定人元好問上耶律中書同賈廷揚薦爲翰林院待制

郃知章家世業儒有詩名與司業王嗣能齊名

楊著平定人爲本州教授金亡聶侯招延之以教鄉里子弟守節不仕自號嘉山逸人

元

顧彥達平定人博覽羣經長於諷詠兄彥恭爲詹事校書郎

產逢與齊名世號二顧

明

王逢字原夫樂平縣人博極羣書不喜爲口耳學從洪公野谷窮究元本與吳存何英余進諸人以理學相砥礪永樂間廷臣交薦不起宣德嗣位熱逢名授福陽訓導亦不赴已復以明經强起之召見便殿論禮樂娓娓數千言次日復召見問兜鍪字不對徑辭出歸卧蓬戶甕牖間終其身學者稱松塢先生

閻璽壽陽人幼讀書能默會其意爲文不事雕琢而矩度秩然成化乙酉舉於鄉益肆力於學甲辰登進士與王虎谷喬白巖王晉溪諸人齊名授戶部主事兼理鈔關商稅羨餘毫不取陞河南潁州兵備副使守正不阿爲劉瑾所陷

瑾誅交薦不起卒於家士論惜之

袁萬里壽陽人嘉靖壬午舉人少穎異讀書日記數千言鄉舉後入國學所交盡天下知名士歸益閉戶於五經諸史悉加探討嘗悼古禮樂及康節數學不傳欲取朱子儀禮一蔡元定律呂新書邵子皇極經世纂爲一書以示後學未成遽卒年甫三十一所著律呂增註黃鐘積算圖藏於家郭紘平定人嘉靖壬午以易魁山西戊戌以尚書登進士累官戶部員外郎紘生有異質四歲時有偶示以字者卽識之不忘讀書窮極理要工書法尤長於詩及官計曹與薦紳先生上下其議論衆皆歛手推服當世文章鉅公如許公松臯喬公白巖咸忘分下交與爲唱和而喬所謂文似左氏詞類屈平者今所流傳晉公子廟碑三儀廟記猶可

少見其概云

李應箕平定人初授業於高陵呂枏壁書志顏豐四字枏
曰李生少年美質篤志於道何患不到聖賢地位授狄道
知縣與典史楊繼盛並以名節相高父雙崖卒於任所貧
僅舉櫬謝絕賻賄人稱爲孝廉

國朝

白允彩字居實平定州人幼讀書過目成誦嘗從書肆中翻
閱制義歸而錄之不少訛號高才生性醇謹斂束繩墨然
觸意氣輒前不少挫晚年鍵戶測魚村中時教授生徒資
束脯以自給而嗜詩特甚上下三唐沉潛反覆論詩能獨
闢畦徑賦古近體尤有事外遠致晉人所謂時時舌上吐
青蓮者也詩載晉四人集中

武承謨字劭孟孟縣人已卯庚辰聯雋進士知大庾縣事艱歸復知新安無錫縣卒於官承謨性嚴毅不突梯脂韋以徇人鍵戶讀書世事泊如也釋褐後雜誦不輟問業者恒屢滿戶外間遇誣搆陶如也三起爲縣令所至能洞民疾苦在大庾嘗護理府篆斧劈理解案無留牘無錫煩劇稱難治刻厲不少懈而泣政浹菑民胥宜之其卒也識者惜未盡其才

甄昭字子布平定州人舉庚午解元丁丑進士官翰林院庶吉士出爲玉山縣知縣卒於官昭生有雋才好讀書所交盡天下知名士爲諸生時與儕輩游目上視向空切切語無一足當意者在館中矯尾厲角見人低頭緩步輒目笑不自禁及出宰百里噢咻疾苦能以古訓牖民君子以爲

難

忻州

魏

梁越字元覽新興人博通經傳性純和魏初爲禮經博士道武以其謹厚遷上大夫令授諸皇子經書明元初以師傅恩賜爵祝阿侯出爲雁門太守獲白雀以獻拜光祿大夫卒

金

元德明號東巖秀容人唐禮部侍郎結之後幼讀書鄙事不挂口誠實樂易洞見肺腑布衣蔬食家人不敢以生理累之僮奴竊拾東家棗立督令還人負債往往折券累舉不第放浪山水間終於家工詩清美圓熟集三卷

孫九鼎字國鎮忻州定襄人天會六年經義第一在大學時遊金明作詩云片片桃花逐水流東風吹上木蘭舟隔溪紅粉休相認年少孫郎不姓劉弟九疇億胥有名三人同榜吳彥高贈九鼎詩云孫郎有重名談笑取公卿清廟瑟三歎齊房芝九莖其爲名流稱道如此忻州文派九鼎指授功爲多年八十餘卒

趙元字宜之定襄人經童出身調鞏西簿未幾失明自少博通書傳作詩有規矩泰和後有詩名河東李屏山爲賦愚軒有落筆突兀無黃初之句愚軒元自號也用是名益重南渡後往來洛西山中趙閒閒雷御史王子文許至忠崔懷祖皆愛之所至必虛左以待爲人有材幹處事詳雅旣病廢無所營爲萬慮一歸於詩故詩益工若其五言平淡